

## GUILTS NE PXEEL PABL LO ZHA ROMA

¡Diuzh to grëse to!

<sup>1</sup> Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

<sup>2</sup> Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhobnee Xtiidz me.

<sup>3</sup> Lëew ga rnee ganle cho nac Jesús (men ne briequia lo xtii rey David ne laa me goc miech lo guidzliu;

<sup>4</sup> sangue Espíritu Sant, pxobnen me ganle Xpëed Dios nac me; miñ co gane brieaban me).

<sup>5</sup> Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me.

<sup>6</sup> Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

<sup>7</sup> Laa naa rxel guits rii lo to, grëse to ne no to guiedz Roma i. Golgacnan ganle rleynie Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoze, ni Jesús men ne rnabey, tibaque noxco me to, me nac men ne gacniñ to zeena peet zhgab ctsebde to.

8-9 Nanle to nasca ganle xtsiin Dios quiayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nlipaa dib zdoo to rliladz to me. Me zobwi, me nan ganle zeene rnabtaa naa lo me, ib rianladzd naa to, tibaque rnab naa lo me gacniën me to;

10 ni tibaque rnab naa telne zneedz me diidz gdziñ tib dze ne grieelo guial naa i guialgan naa to.

11 Ne nlipaa rquiabladz naa ganlo naa to, guialzhaal naa gnedz naa rson lo to guiën to zha ycaaniaraa to guielbiini ne rneedz Espíritu Sant; zeena tibleque gac guic to dziitsraa so to.

12 Ni scagaa tipse gac ne zidiidz ne zha nac Xtiidz Ndzon Dios, mine rliladz ne; zeena tipse gac ne sodziits ne low.

13 Bets, bzian, tel gan to ganle blactaa vuelt ziyacldz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa.

14 Sac ible naa raguial cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëгаа zha ne peet rienä.

15 Mincocxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

*Poder ne rap Xtiidz Ndzon Dios*

16 Tel naa, ib rtoladzd naa gne naa Diidz Ndzon rii lo miech, sac ncuaan ro ne run Dios zeene rquiaadiag miecha. ¡Grëse miech ne gliladza, ib zlaa zho lo xtol zho! Laa guielnzaac co no niina par grëse miech. Glose lo zha Israel bdziņa, laa niina laaw quiadziņ lo grëraa miech, zeena grëse zho gbig sëeb xnëz Dios.

17 Sac goņ, lëe Diidz Ndzon rii rlu zha rbiire rcaania Dios miech, rsaņmbe me zho lo dol rbiire riaanwen zho lo me: totsaque nli dib zdoo zho gliladz zho miņe nac Xtiidz me. Sca zhobnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdoo zho rililadz zho miņe nac Xtiidz me.”

### *Xtol miech*

18 Ndionle ne ganle no guielnë ro ne csiaab Dios ygaa grëse miech ntseeb, miech ne nëd gac-wen, ni desde gbaa cxeel me guielnë ne ygaa zho; sac por xquielntseeb zho rsaand zho gacnaņ grëraa miech miņe nac diidzli.

19 Grë zha ntseeb, nanle zho zha nac Dios, sac mezhal blu lo miech zha grieelo gunbey zho me.

20 Niicle ne grieelod ganlo ne Dios, per de lo grëtaa ncuaane bzaa me, grëtaa ncuaane run me, gase rlu ganle cho nac me. ¡Gase rlu ne nli me nac Dios, ni gdziņd dze ne lozh xpoder me!

Gacxe waa grë zha ntseeb, ib tedlaad zho lo guielnë ne csiaab me ga;

21 sac goņ niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguiala, niicle xquizh nanđ zho gdeed zho lo me. Laa ne rzac zho na rien zho pe run zho, lel

pcow xquielrien zho; rzac zho na lëew ga, gun zho ncuaane guiaabtaa guic zho.

<sup>22</sup> Niicle ne rzac zho zharien zharac nac zho, per zha nac miech ne quialoozhraa lo xquieln xen;

<sup>23</sup> sac gon laa ne gunbey zho guielndzon ne rap men ne nacpaa Dios nguiamban, lel rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; lel grë ncuaan co ziegan zho laa ne gleynie zho men ne nacpaa Dios.

<sup>24</sup> Mincoxe nagon waa, rsaanladz Dios zho laa zho zienal grë ncuaane ndzinlid ne rzoobladztaa zho. Grë ncuaane ntöladzdox ne run zho, lëëque zha runnguzee zho rguitnie zho xcuerp zho.

<sup>25</sup> Sac laa ne gleynie zho diidzli mine rnabey Dios, lel mine rnee zha ne rquidie rleynie zho; lel grë ncuaane bzaale Dios, ncuaane psanle me, ncuaan co ziegan zho, lo grë ncuaan co ziequitsgzhib zho; laa ne yquitsgzhib zho, gleynie zho men ne nac Dios mban, men ndzon ne psan grëtaa ncuaane no. ¡Diosse riegualgunnon miech, men co riegualtibaque goolnie zho! Sca rieguala.

<sup>26</sup> Ne sca nagon nac zho, gane psaan Dios zho laa zho run grë guilyozh, ncuaane ngubeeguielto ne riegualdraa gun miech. Grë wnaa laa ne gdeed zho diidz gnee tsiel zho lo zho, lel lëëque sawnaa zho rquiangob zho, laa zho zienal grëraa guilyozh;

<sup>27</sup> grëgaa mgui, laa ne gnee zho lo wnaa ne nac tsiel zho zigne biaan no gaca, lel lëëque sabgui zho rzoobladz zho. Ncuaane mbixladz run zho, rquiangob zho lëëque sabgui zho; ni ne sca run zho grë ncuaan co, lëë mine rdziniaa zho nac grë

guielguidz yozh ne riaan lad zho; ndzinlidraa rac zho.

<sup>28</sup> Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grë zhgab yozh ne no guic zho, no zdoo zho, miñ co ne scataa nac zho.

<sup>29</sup> Nroobdoo nac xtol zho, sac:  
 rsacsixuu zho samiech zho,  
 rzoobladz zho ncuaane quianied zho,  
 racntseeb zho lo samiech zho,  
 në rac zdoo zho ran zho stib noded samiech zho,  
 rut zho samiech zho,  
 rtsidil zho samiech zho,  
 rquidie zho samiech zho,  
 rquiadiidzguizh zho samiech zho,  
 miech yozh nac zho,

<sup>30</sup> rneenë zho samiech zho,  
 rquiabro zho lo samiech zho,  
 racniats zho lo samiech zho,  
 rlu zho ncuaane rapd zho, ncuaane nacd zho;  
 rlëënie zho Dios,  
 rio zho rbeebey zho grë guielntseeb,  
 rond zho xtiidz pxoz zho,  
 rond zho xtiidz xniaa zho,

<sup>31</sup> racladzd zho gon zho diidz,  
 rund zho mine rnee zho,  
 rleynied zho samiech zho,  
 rund zho samiech zho perdon,  
 rquiad zdoo zho samiech zho.

<sup>32</sup> Niicle ne nanpaa zho zha rnabey Dios none gban miech, niicle ne nanpaa zho grëse zha ne run guielntseeb, ib tedsod znitlo zho; ni laa zho bii quiayuna, ni haxta rley zho ran zho cho grëraa zha ne run grë mine run zho.

## 2

### *Xquielwxtis Dios*

<sup>1</sup> Ib tedsod no to gnë: “jZha ntseebtaa miech ne sca run!” jPer gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac riegual zha co ygaa zho guielnë ne csiaab Dios, ye zho riegual min co.

<sup>2</sup> Ndion ne ganle Diossi zeene laa me gun guielwxtis, grëse zha ne sca zienal guielntseeb, ib tedsod zunquizh me zhow.

<sup>3</sup> Zha ne sca rlozhd gzee zdoo pe quiayun stib zho, haxta rlisqui zho mine quiayun zha co, ni yeque zho quiayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa.

<sup>4</sup> None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaane run zho; sac laa me quiambëz csaan zho xquielntseeb zho, yguudz zdoo zho gban zho zigne rnabey me.

<sup>5</sup> Telne tibaque squi ndip gac zdoo zho, gond zho mine rnabey me; gacnan zho ganle, quiayunloraa zho grë guielnëdox ne ygaa zho gal dze ne laa me gun guielwxtis. Ni xquielwxtissi me, zigne riegual gaca sca gun mew.

<sup>6</sup> Gal dze co, laa me gdeed mine riegual ygaa tib tib miech tel zha wban zho.

<sup>7</sup> Grëse zha ne güeynal beennon zho lë me, pxoben zho xquielndzon me, güeynal d zho grë ncuaane rnitlo, lo zha co gdeed me tib guielmban ne gdzind dze lozh.

<sup>8</sup> Saṅgue grē zha ne güeynaḷ loxaque grē zhixco zho, güeynaḷ zho grē guieḷntseeb, laa ne nienal zho miṅe nac diidzli; zha co yгаа grēse zhian ne csiaab me.

<sup>9</sup> Ga nagon, grēse zha ne run guieḷntseeb, zigtaa zha Israela, zigtagaa zha stib guiedza, ible zгаа zho tib guieḷnēdox;

<sup>10</sup> saṅgue grē zha ne rban zaacse, zigtaa zha Israela, zigtagaa zha stib guiedza, ible zгаа zho lo xquieḷndzon me, zunnon me zho. Ni led yedraa ga pe zhgab ctseb zho.

<sup>11-15</sup> Grēse zha ne guṅctal xtoḷ, teḷ chotaa nac zho zunquizh Dios zhow; sac teḷ me, led yed me cue. Zig nac grē zha ne beenbeyd xley me, zunquizh me zho grē xtoḷ zho; sac niicle ne gocnaṅpaa zho zha naca, per leṅ zdoo zho, guic zho, naṅpaa zho pa miṅ nac guieḷntseeb, pa miṅгаа nac guieḷwen. Rrieequiacxe waa runbeyle zho xley Dios ga. Scaqueгаа zha Israela, ne nac zho zha ne runbeypaa xley Dios, zunquizhaque me zho grē xtoḷ zho; sac niicle ne runbeypaa zho xley me, per teḷ lozh ga mband zhow. Naṅpaa zho pa miṅ wen, ni teḷ lozh ga rond zho diidz guṅ zhow; sac gon, ledxe por ne gacnaṅdse ne ley waa laa Dios ycaaniale ne, sinque none gban new.

<sup>16</sup> Zdziṅ tib dze, zeene laa Dios cxeel Jesús, guṅquizh me miech grēse doḷ ne been zho tib tib zho, niicle miṅe mazdraa rzac zho ngueets zhliaan been zho; sac sca rnabey Dios gaca, ni miṅ co noseed naa miech.

### *Zha Israel ni xley Moisés*

<sup>17</sup> To ne nac to zha Israel, rzac to zienalṅpaa to xley Moisés, niats rac to, rzac to tose non lo Dios.

18 Nañwen to zha racladz Dios gban to, nañpaa to pa miñ wen sac pseed to xley me.

19 Miñ co masaque rzac to to cseed zha ne no lo ncow, grë zha ngoopdol.

20 Masaque rzac to to rienraa zha cseed to grë zha ne peet gacd, to rienraa zha quixbiini to grë zha ne peet rienđ; sac rzac to ne nañ to ley, tose nac zha ne ndziibraa nixbiini, tose nañ miñe nacpaa diidzli.

21 Nana, tel scataa rien to zha cseed to stib miech, ¿pe nac dzigo rwide to miñe run to?

Conque to name rnee lo miech cuand zho, ni rlozh ga toque quiaban.

22 Rseed to miech rnee to, tib zha ne nole tsieel, nodne yquiangob zho stib zha ne led tsieeld zho; ni rlozh ga toque noyun miñ co. Rnee to, rdziguiende to grë mdio, ni rio to rieban to yadoo ne zob grë mdio co.

23 Rlozhd gacniats to rzac to quiayunnon to lë Dios ne nañ to ley, ni nande to gon, lel quiaguitnie to lë me ga, sac mbande to zigne nac ley.

24 Miñe noyunpaa to i ga gon raquiet lo Xtiidz Dios, zaatne rnee: “Por xtol to, grë zha zit laa zho rneenë Dios.”

25 Tel to, rzac to porne nacse to zha Israel non to lo Dios, per ne squi mbande to zigne nac xley me, nacaque to zigne nac grë zha zit ne runbeyda.

26 Nana, zha zit ne rioxco rban zigne nac xley me, ¿niacxe rieguiald dzigo guianzuiuu zho lo Dios? Sañzuiuu me zho gon.

27 Golgacnañ sca ganle, glole zha zit co gon guianzuiuu lo Dios, lëdle to ne nañpaa to zha racladz



Dios gban to, nanpaa to miñe psan Dios diidz ygaa to, ni rbande to zigne rnabey me.

<sup>28</sup> Golgacnan sca ganle, led porne nacdse to zhin zha Israel, porne bio to xbey zho, laa to nziuule lo Dios.

<sup>29</sup> Led scada gon, sinque zha ne nli dib zdoorioxco miñe rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoor, dib guic, rban zigne racladz me. Grëse zha ne znu nac, nziuu zho lo Dios, niicle telne rzac to peet nond zho.

### 3

<sup>1</sup> Nana, ¿pa lugar nadien ne riaannon zha Israel lo grëraa zha stib guiedz? ¿Pa rquiin ne scataa rio zho bey? Zootle lëë lalaquew tel niaca miñe niacd zho zha Israel.

<sup>2</sup> Per led scada, no pe nacne non zho. Sac gon, ible lo zho psan Dios xtiidz me mazd padzeela.

<sup>3</sup> Nli ndal zho rond xtiidz me, per led mincod ctsëë me xtiidz me, miñe bneele me lo zho.

<sup>4</sup> Niicxe tel zharaa quiayunctal miech xtol zho, sangue Dios ctsëed me xtiidz me. Zigne zhobneeque lo Xtiidz me, zaatne rnee: “Miñe rnee Dios, diidzli naca; niicle zha ne gacladz, guiend pe ncuaañe glisqui zho lo me.”

<sup>5</sup> Sca nac Dios, gacxe waa rnee me grëse zha ne runctal xtol, rieguial ygaa zho guielne ne cxeel me. Ga nagon, rlu ne miñe nac diidzli, min co run me. Nana, ¿pe ziaab ne nonguield miñe run me ga?

<sup>6</sup> Miñe nonguiel ga gon run me, sac tel gdziguien me grë zha ne runctal xtol, ¿zha naczhe guielwxtis ne dzigo gon me?

<sup>7</sup> Nana, nogaa zho gnë, ¿per pe nacne glisqui Dios dol ne rdziuun ne, ni tel por lëew rlu ne diidzli nac miñe run me?

<sup>8</sup> Per telne sca naca, rrieequia dzigo ib none guncal ne xtol ne parne yquiaraa zdoo me ne. Ni nzian zha ne nobee xquielto naa, rnee zho ib miñ co noseed naa miech. Ni zha ne sca rnee, ib tedlaad zho lo guielnëdox ne rieguial zho.

### *Grëse miech, ngoopdol nac zho*

<sup>9</sup> Nana, ¿pe zdieets ne dzigo ne nac ne zha Israel, nziuuraa ne lo grëraa miech stib guiedz? ¿Led scada gon! Niina blozh bzeet naa lo to, grëse ne ngoopdol nac ne, zigtaa zha Israela, zigtagaa zha stib guiedza.

<sup>10</sup> Zigne zhobneeque lo Xtiidz Dios, zaatne rnee: ¿Guiend miech ne zienalpaa miñe racladz Dios! ¿Ni tib zho guiend!

<sup>11</sup> Guiend zha ne niini guic; guiend zha ne tsoxco yguib xnëz Dios.

<sup>12</sup> Grëse zho laa zho zie nëz ne nitlo zho; niapse guielntseeb zienal zho. ¿Guiend zha ne zienal miñe racladz Dios! ¿Ni tib zho guiend!

<sup>13</sup> Ro zhow, masaque been cuent naca zig nac len grë baa ne noyodz ngutoo; niapse diidz ne rquidie zho zhoob lo ludz zho. Grë diidz ne rnee zho, masaque naca zig nac xvenen grë meel dox;

14 niapse grë diidz dox, niapse grë diidznë rrieche ro zho.

15 Ni zhow, masaque zombëzlew dien pa tsiegut zho samiech zho;

16 loxaque guielnë, loxaque guielzi rsañ zho zaatne rded zho.

17 Ib nand zho ne zaacse gbannie zho samiech zho;

18 per ni Dios rdziebdraa zho.

19 Gacxe waa nroob nac guielnëdox ne ygaa grë zha ne runbey ley ni mband zho zigne naca, leļ run zho grëtaa guielntseeb zig nac grë miñe goquiet nu. Ni niicle grëraa miech ne runbeyd ley, scaque ngoopdol nac zho, ni ro zho guieñd pe guiab zho lo Dios.

20 Golgañ sca ganle, grieelod guiaanmbe ne lo Dios, niicle paraa yquia ne gun ne miñe rnee ley; sinque par guieñ ne ganle ne ngoopdol nac ne, gane biaan ley.

### *Silaa Dios miech zeene gnalo zho me*

21 Sangue niina, tib ladle biaan ley, laa Dios bneedz stib mod ne guiaanwen ne lo me. Ni lo grëque guits ne ziaad ley, lo grë guits ne pquiaa zha ne biadteed Xtiidz Dios padzeela, ga raquieta.

22 Grëse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

23 Zigne rne naa ga, grëse ne miech ngoopdol nac ne lo Dios, ni palal rdzieeld gdziñ ne lo xquieñdzon me.

24 Per niina laa me blu ganle pa lotaa noxco me ne, gola zdoo me pxeel me Jesús bdiizh grëse xtol ne, laa ne biaanwen lo me.

25 Laa me been min co parne glu run me guielwxtis, sac niicle bdizhd ne xtol ne, per pxeel me tib men ne bzhiee xchen bdiizha xcuent ne, lëë men co nac Jesús; gane niina grëse zha ne gnalo men co, zun me zho perdon grëtaa dol ne pxecw me been zho.

26 Ni tib dol rapd me, ni scaque grë zha ne dib zdoo gnalo Jesús, sanmbe me zho lo xtol zho.

27 Sca nagon psilaa Dios ne lo dol. ¿Cho nadien gacniats ga? Ni tib choot gacd gacniats, sac led por mine bdziuund new, sinque por grëtaa mine bded Jesús.

28 Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho mine rnabey ley.

29 Nana, ¿pe zha Israelse sca ycaania me? ¡Lëda gon! Grëse miech, sca ycaania me zho.

30 Sac gon tibeyse ran Dios ne grëse ne; zigtaa zha Israela, zigtagaa zha stib guiedza, sanmbe me ne lo grë xtol ne, totsaque dib zdoo ne gnalo ne Jesús.

31 Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoo ne riladz ne Jesús, rienraa ne pa rquiina.

## 4

### *Dib zdoo Abraham bnalo me Dios*

1 Zig nac pxozgoldoo ne Abraham, ¿pe been me ne laa Dios pcaania me?

<sup>2</sup> ¿Pe por guielwen ne been mew? ¡Lëda! Telne scaw, nrieelo niacniats me (niicle ne nëz lo Dios ni palal rieguald niacniats me).

<sup>3</sup> Sac gon rnee lo Xtíidz Dios, ne dib zdo me bliladz me Dios gane pcaania Dios me zig tib zha ne peet xtold.

<sup>4</sup> Zig nac tib zha ne run dziin, dimi ne razh zho ible riegual zhow, rate zhow ga.

<sup>5</sup> Sañgue Dios zdo me ral rcaania me miech, zha ne dib zdo rnalo me, nacda por pe guielwen ne gun zho par guiab ne laa zho rieguala.

<sup>6</sup> Ye rey David bzeet guielbley ro ne rgaa zha ne sca rcaania Dios,

<sup>7</sup> rëb David:

¡Wen zie zha ne run Dios pardon!

Niicle nroob guielntseeb ne been zho;

tel pe nactaa xtol zho, glisquidraa mew.

<sup>8</sup> ¡Wen zie zho sac gunquizhdraa me zho grë xtol zho!

<sup>9</sup> Nana, ¿pe loxaque grë zha ne nose bey zrieelo ygaa guielbley co, te ye grë zha ne noda ye? Nacda por bey, laa ne blozh bzeet ganle niapse ne dib zdo Abraham bnalo me Dios, miñ co ne pcaania Dios me zig tib zha ne peet xtold;

<sup>10</sup> sac gon gard pe bey ne tso me zeene pcaania Dios me.

<sup>11</sup> Pcaaniale Dios me dzigoraa bio me bey. Lega laa me biose bey co, zeena glu ne laa Dios pcaaniale me porne dib zdo me bnalo me Dios. Miñcocxe waa, Abraham nac dad lo grëse zha ne nod bey, ni dib zdo zho rnalo zho Dios; ni scagaa Dios, rcaania me zho zig tib zha ne peet xtold.

12 Ni meque nac dad lo grë zha ne no bey ni dib zdoos zho rnalos zho Dios, zigne bnalo me Dios zeeñe gard tso me bey co.

### *Zha goc miñe bnee Dios lo Abraham*

13 Psañle Dios diidz lo Abraham ne me guidaañnie guidzliu, grë me zha ne grieequiaraa lo xtii me; guiabd ne togo porne been me miñe nac xley zha Israela, sinque ne dib zdoos me bnalo me Dios.

14 Nana, tel niaca zha ne guñse miñe nac ley, zha cose ygaa miñ co, rrieequia dzigo zhlëse ga bnalo Abraham Dios, niicle diidz ne psañ Dios lo me ga, nondaqew.

15 Sac nac ley gon, zha ne guñda zigne naca, laa Dios csiaabzi zho; laa zaatne guiendgaa ley, gacd guiab zho cho noguiitsa.

16 Ne scacxe waa nac ley, gane niina lëese miñe no guñ ne nac dib zdoos ne gnalo ne Dios par ygaa ne miñe psañle me diidz ga. Grëse ne ygaa miñ co, per nacdraaw dien cho zienal ley, cho zienaldgaaw, sac miñe nonraa, dib zdoos ne gnalo ne Dios zigne bnalo Abraham me. Miñcocxe waa, rrieequia Abraham nac pxoz ne grëse ne,

17 zigne rëb Dios lo Abraham: “Laa naa bzo luu, luu gac dad lo nzian dii miech.” ¡Lëe Dios co nagon bliladz Abraham, me rbeeban grë mengut, ni niicle haxta grë ncuaañe guiend, saa mew!

18 Ndaldox rëb Dios gac lo xtii Abraham, ni bliladz Abraham miñe rëb Dios ga. Niicle ne zootle led ncuaañe gacda, per me dib zdoos me bliladz me ne zaca, ni scagaa bdziñ dze ne laaw goc.

<sup>19</sup> Tibaque bnalo me Dios, niicle ne lala ziele xtse me (zig tib gayoole iz me), ni lala tsieel me Sar, nacd me wnaa ne gap mēēd.

<sup>20</sup> Ib goc chopd guic me niab me bod nlid niac miñe bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios,

<sup>21</sup> sac nanpaa me meñ nroob nac Dios zuñ me miñe psañ me diidz ga.

<sup>22</sup> Ne sca nagon dib zdoo me rnalo me Dios, gane pcaania Dios me zig tib zha ne peet xtold.

<sup>23</sup> Zhobnee lo Xtiidz Dios sca pcaania me Abraham, ni laaw zhobnee zeena gacndion ne

<sup>24</sup> ye ne scaania me ne zig tib zha ne peet xtold, totsaque dib zdoo ne gnalo ne Jesús, meñ ndzon ne rnabey ne;

<sup>25</sup> meñ ne gut ga bdiizh me xtol ne, meñ ne brieaban ga, par glu me nli psañmbe me ne nēz lo Dios.

## 5

### *Jesús rsañmbe miech lo dol*

<sup>1</sup> Nasi laa ne nacle zig zha ne peet xtold, laa ne biaanwenle lo Dios porne dib zdoo ne rnalo ne Jesús, meñ ndzon ne rnabey ne.

<sup>2</sup> Sac por grētaa miñe bded Jesús, laa ne bgaa guielnzaac rii nacnie me ne, ni ib csaand ne me. Tib guielbley nrooba lo ne, sac ndionpaa ne ib zgaa ne lo guielndzon ne no me.

<sup>3</sup> Ni scaquegaa nagon none gley ne zeene pe guielñe ne nodzian ne; sac ndion ne ganle, ga cseed ne lēb ne dziits so ne lo miñe riladz ne.

<sup>4</sup> Ni zeene sca dziits so ne, zliadzraa ne dib zdoo ne; ni zeene dib zdoo ne rliladz ne, zacnaṅpaa ne ib zгаа ne miṅe rliladz ne.

<sup>5</sup> Ni ndionṅpaa ne zгаа new, sac blu Dios rleynie me ne, pxeel me Espiritu Sant nacie ne.

<sup>6</sup> Lëëtaaque zeene rdzieldraa miech zha guṅ zho par guiaaṅmbe zho lo dol, hor co laa Dios pxeel Jesús, biaad me gut me bdiizh me xtol ne nac ne miech ngoopdol.

<sup>7</sup> Ndion ne gaṅle, niicle tib miech ne peet xtolda, tib miech ne mazdraa wena, led lega grieequiad tib zha ne cueeladz xquielmban guet por zha.

<sup>8</sup> Saṅgue Dios goṅ, niicle ne miech ngoopdol nac ne, blu me gaṅle pa lotaa nquialadz me ne, pxeel me Xpëed me Jesús, meṅ co bleeladz xquielmban gut me xcuent ne.

<sup>9-10</sup> Gotsaa gwi ne gaṅle, zha nactaa guielnë ne bded Jesús psanṅmbe me ne lo xtol ne, psanṅwen me ne lo Dios; ni scaque nagoṅ, ible me csilaa ne lo grëtaa guielnëdox ne csiaab Dios yгаа grë miech ntseeb. Ne nligaa, csaand me dziaṅ ne guielnë co; sac goṅ, tel scataa miṅe been me por ne zeene nac ne tib miech ngoopdol, zeene scataa ntseeb goc ne blëenie ne Dios, ¿pe lel na dzigo ne laa ne biaanṅwenle lo Dios, laa ne biaanle zig tib zha ne peet xtold?

<sup>11</sup> Gacxe waa, niina ne psanṅwen Jesús ne lo Dios, none ine gley ne ne laa ne ngable lo Dios.

### *Zha nacie biaan dol*

<sup>12</sup> Znu goṅ nacie laa dol biaan: por miṅe been Adán bind me xtiidz Dios, miṅ co nac ne biaan. Ni por lëew pquiaqui laa guielgut biaanaque, blozh



ga grëse miech laa zho ret, sac grëse zho, tsod zha ne guñctald xtol.

<sup>13</sup> Desde hor co biaan runctal miech xtol zho. Grëse miech ne bre lo guidzliu, desde Adán haxta len dze ne laa Moisés pcaania ley, beenctal zho xtol zho, niicle ne guiendpaa tib ley hor co nlu ne doła.

<sup>14</sup> Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

<sup>15</sup> Nli tib guielnë ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne biaad stib men ne beend ni tib falt, por min co laa Dios rquia zdoe ne grëse ne, laa me rneedz tib guielmбан ndzon lo ne; lëe men co nac Jesús.

<sup>16</sup> Tibaque nac dol co been Adán, per grëse miech biabzi; sangue Jesús zeene laa me biaad, grëse ne ne nac ne miech psilaa me ne lo grëtaa xtol ne, psanwen me ne lo Dios.

<sup>17</sup> Dol ne beense Adán ga, min co pquiaqui grëse ne ne nac ne miech, laa ne biaan ladznia guieltgut; sangue niina ne biaad Jesús, zrieelo ygaa ne tib guielmбан ndzon. Guielmбан ne ral zdoe Dios gdeed me lo grëse zha ne gbig lo me guñ me zho perdon.

<sup>18</sup> Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús biaad, pquia zdoe me ne masaque me bdiizh grëse caxtigw ne riogual ne ga, laa me psanwen ne lo Dios parne grieelo ygaa ne tib guielmбан ndzon.

<sup>19</sup> Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per

scagaa, por bzoob Jesús grēse xtiidz Dios, zha ne gacladztaa, zrieelo guiaaṅwen zho lo me.

<sup>20</sup> Ible laa ley biaan, par glu ganle pa lotaa nac grē falt ne noyun miech lo Dios. Per niicle scataa nac grē dol co, per blu Dios ganle mazdraa rquia zdoo me miech.

<sup>21</sup> Masaque bnabey dol miech, pxeela zho nēz ne nitlo zho; saṅgue zeene laa Jesús baaad, psanwen me ne lo Dios, gane niina zha ne gnalotaa Jesús zgaa zho tib guielmban ndzon.

## 6

### *Zha ne mbanniele Jesús*

<sup>1</sup> Laa ne bdzianle ganle zha noxcotaa Dios ne. Nana, ¿pe zdieets ne dziuunctalraa ne xtol ne zeena tsoxcoraa me ne?

<sup>2</sup> ¡Lēdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nēz lo dol.

<sup>3</sup> Golgan ganle, zeene laa ne bziaab xnēz Jesús ni brobnis ne, rrieequia gut ne ga zigne gut me.

<sup>4</sup> Zeene brobnis ne rrieequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rrieequia brieegan ne, stible guielmban ne rdziaap ne.

<sup>5</sup> Ni zigne sca rrieequia gut ne zeene gut Jesús, scaquegaa ndionpaa ne zbeegan me ne zigne brieegan me.

<sup>6</sup> Ndion ne ganle, miech ne goc ne glo zeene scataa bional ne guielntseeb, rrieequia ye miech co pquianie me lo cruz. Ga bnitlo miñe goc ne ga, zeena ygadoodraa ne lo dol;

<sup>7</sup> sac gon, deque bnitlo grē minē goc ne glo, grieelodraa gnabey dol ne.

<sup>8</sup> Nana, telne scale gutnie ne Jesús, ndionpaa ne ib zbannie ne me.

<sup>9</sup> Ndion ne ganle brieegan Jesús, ni gdzindraa dze guet me. Grieelodraa pe gun guielgut me.

<sup>10</sup> Tibaque vult gut me bdiizh me xtol grēse miech, sanque niina mban me ni Dios mbannie me.

<sup>11</sup> Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to minē rnabey Dios. Golguien ganle, Jesúsle nacie to.

<sup>12</sup> Nana sca, gdeetraa to diidz gnabey dol xcuerp ben to i, tso to gun to grē ncuaane ndzinlid ne racladz xcuerp to.

<sup>13</sup> Ib gdeete to diidz guiab to lo dol stib, gun to grē guielntseeb; sinque golsan to lадznia Dios, ine golgun grē minē racladz me. Golguien ganle, laa to gutle lo grē dol, Diosle mbannie to niina;

<sup>14</sup> zeena scagaa gnabeydraa dol lo to, zigne beena to zeene scataa bioxco to minē rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne.

<sup>15</sup> Per nana, ¿pe ne rnabeydraa ley ne, pe ne nquialadz Dios ne dzieets ne dziuun ne grētaa ncuaane guntal xtol ne? ¡Lēda ga gon!

<sup>16</sup> Nanle to ganle, tib zha ne nanle cho lo yquia zho dziin, lo zha co ngadoo zho ni minē rnee zha co none gun zho. Zig nac zha ne ngadoo lo dol, niapse dol run zho ni minē tsieguial zho laa zho

nitlo; san̄gue zha ne run̄ mine rnabey Dios, scaania Dios zho zig tib zha ne peet xtold.

<sup>17</sup> Nli glo lo dol̄ ngadoo to, per xquizh Dios zeene laa zho biadseed to Xtiidz me gocnañ to zha laa to lo dol̄, laa to bliladza ni noxco to mban tow niina.

<sup>18</sup> Ni zeene laa to brieeladznia dol̄, laa to bgab lo Dios; zeena mine rnabeyle me min̄cole gun̄ to.

<sup>19</sup> Znu bzet naa grē min̄ rii lo to, zeena guien̄ to zha naca.

Nana sca, zigne scataa bio to ladznia dol̄ been̄ to grētaa guiel̄yozh, grētaa guiel̄ntseeb, scagaa niina gol̄sañ to ladznia Dios, gol̄ban zigne rnabey me, zeena lozh guiaan̄mbe to zigne racladz me.

<sup>20</sup> Zeene scataa ngadoo to lo dol̄, ib wbande to zigne rnabey me.

<sup>21</sup> ¿Pe nadien̄ needz dol̄ lo to? Lëe gdib mine ngaa to laa to nitlo. Zig nac niina, haxta rtoladz to zeene rsoladz to grē ncuaane been̄ to hor co.

<sup>22</sup> San̄gue niina, ne laa to brieele ladznia dol̄ laa to ngab lo Dios, ible ziaan̄mbe to zigne racladz me ni zgaa to tib guiel̄mban ne gdziñd dze lozh.

<sup>23</sup> Sac gon̄, zha ne run̄ctal xtold, lëe gdib mine tsieguial̄ zho laa zho nitlo; san̄gue zha ne gbig lo Jesús, mine ral zdoo Dios ygad me lo zho nac tib guiel̄mban ne gdziñdraa dze lozh.

## 7

<sup>1</sup> Bets, bzian, to ne nac to zha ne run̄bey Xley Dios, nan̄wen to gan̄le, zeene zombanse miech dzigo rrieelo rnabey ley co zho.

<sup>2</sup> Zig nac tib mgui ne rtsieelnia, rnabey ley ne mguise gbannie wnaa ne nac tsieel mgui. Per tel̄ gzoob ne glo mgui guet, dzigo gacdraa gnabey ley

ne mguipaa gbannie wnaa co; telne gacladz zho ctsieelnia zho stib mgui, zaca.

<sup>3</sup> Nli nonguielda ga gun wnaa ctsieelnia zho stib mgui laga bii zomban tsiel zho; laa zeene gutle tsiel zho, led doldraaw yguib zho stib zha ne ctsieelnia zho.

<sup>4</sup> Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoo-draa to lo ley, niicle lëegaaw grielod gnabeya to. Jesús, men ne brieaban ga, mele nac tsiel cub to niina. Niinasi, zrieelole gban to zigne racladz Dios;

<sup>5</sup> sac glo (zeene scataa bdziuunctal ne xtol ne, bdziuun ne grëtaa ncuaane nonguieldraa niicle ne ndionpaa ne pe nac mine zhobnee lo ley no dziuun ne), niapse grë ncuaane nxeel ne zaatne nitlo ne, ncuaan co bdziuun ne.

<sup>6</sup> Blactaa bgadoo ne lo ley, sangue niina rrieequia gutle ne nëz lo ley, laa ne mbanle zigne rnabey Espiritu Sant.

### *Rca dol gac mine rnabey ley*

<sup>7</sup> Nana, ¿pe zdieets ne dzigo por leypaa rdziuunctal ne xtol ne? ¡Coo, led scada! Tel naa gon, ib niacnand naa pe nac dol telne guiend ley. Niacnand naa ne dol ga gzoobladz ne chen ben, telne niacnand naa ne rnee lo ley: “Gzoobladzd luu chen ben.”

<sup>8</sup> Zeene gocnan naa zha nac ley, dzigora bien naa niapse dol nac mine noyun naa; sac zeene guiend ley, rlud pe nac dol.

<sup>9</sup> Glo zeene riend naa zhapaa nac ley, tibaque rzaac naa ib peet dol rapd naa; per zeene gocnan

naa zha nac ley, bien naa ne ib raguial naa nitlo naa, sac dol quiayun naa.

<sup>10</sup> Nli laa ley biaan zeena guien ne zha grieelo ygaa ne guielmban, per lel bluw ne raguial naa nitlo naa sac ngoopdol nac naa.

<sup>11</sup> Ne nligaa bdziitnie dol naa, mine rsopaa ley diidz nod gun miech mincopaa ben naa; ni blozh ga, lëëque ley blu ne ib raguial naa nitlo naa.

<sup>12</sup> Niicle ne scaw, per Dios psana ni rquiin grë mine zhobnee low.

<sup>13</sup> Nana dzieets ne: conque telne wen nac ley, ¿zha nac dzigo ne lëëpaaw rlu ne riogual ne guet ne? ¡Coo, led scada! Sinque znu naca: dol pteedquie ne ladznia guielgut. Ga rlu ganle zha nactaa dol, sac gon lëëque ley pquiin dol pteedquiew ne lo guielgut. Ga blu ley ganle zha ntseebtaa nac dol.

<sup>14</sup> Gotsaa gwi ne ganle wen ley, led leyd rxin sinque ne rxin; sacne rrieequia ngadoo xcuerp ne lo dol.

<sup>15</sup> Tel naa, riend naa pe nacne znu rac naa, niicle ne racladzpaa naa gun naa ncuaane nonguiel per nëda, lel ncuaane rzoobladzd naa min co run naa.

<sup>16</sup> Grë ncuaane run naa, now rienpaa naa nonguielda; haxta guic naa, zdoo naa, rien naa wen ley sinque naa quiaguits mine rnabeya.

<sup>17</sup> Nana, niicle ne rien naa scaw per gacd pe gun naa, sac ngadoo xcuerp naa lo dol, masaque dol rcheep naa run naa ncuaane ndzinlid.

<sup>18</sup> Rien naa miech ngoopdol nac naa, ni palal ncuaane ndzinli gacd gun naa; niicle ne racladz naa gac-wen naa, per rrieeeloda.

19 Zeene racladz naa guṅ naa ncuaane rquuin, per rriee lod guṅ naaw; laa zeene ni naa guṅdraa naa ncuaane ndzinlid, leḷ miṅcole ruṅ naa.

20 Ni ne znu leḷ grē ncuaane racladz naa, miṅ co ruṅ naa, gase rlu ne led naadse quiayun grē ncuaan co; sinque dol quianabey xcuerp naa ruṅ naaw.

21 Rien naa niicle ne racladzpaa naa guṅ naa ncuaane wen, per leḷ guieḷntseeb ruṅ naa.

22 Zdoo naa, guic naa, rley nie naa Xley Dios, racladz naa gban naa zigne rnabey me;

23 per dzigo rtse dol lo naa, rriee lod guṅ naa ncuaane nonguiel. Masaque dol rnabey xcuerp naa, racladzda guṅ naa ncuaane rnabey Dios; sac ngadoo xcuerp naa lo dol.

24 ¡Probsaxe naa, znutaa nac xcuerp ngoopdol naa nu! ¿Cho samiech ne dieṅ griee lo csilaa naa low; sac ncuaane gnitlo naa miṅ co mazdraa rdziladza?

25 ¡Xquizh Dios pxeel me Jesús biaadsilaa me ne lo dol!

¡Jesús nac meṅ ne psilaa naa!

(Znu nagon rzac naa: rien naa nonguiel guṅ naa miṅe nac Xley Dios, per xcuerp naa leḷ laaw zienal miṅe rnabey dol.)

## 8

### *None gban miech zigne racladz Espíritu Sant*

1 Laa ne gocndion nasca ganle, zha ne ngab lo Jesús ndziibdoldraa zho,

2 sac zha ne ngab xnēz me, laa Espíritu Sant psilaale zho lo dol, laa me psilaale zho ladznia guielgut, laa me bdeedle tib guieḷmban cub lo zho.

<sup>3</sup> Wlaltaa ib brieelod ley nsilaaw ne lo dol, gane mazd laa Dios pxeel Xpëed me biaadsilaa ne. Brieelod ley, sac grëse miech laa ne tsienal zho miñe rnabey ley, mazdraa zienal zho ncuaane runctal xtol zho. Gane zeene pxeel Dios Xpëed me, goc me miech (lëëraasi ni tib dol beend me), men co gut bdiizh grëse xtol ne, dzigo ga laa me psilaa ne ladznia dol.

<sup>4</sup> Gacxe waa, niinasi zrieelo dziuun ne grë miñe rnabey ley, per none gdeed ne diidz guional ne miñe rnabey Espíritu Sant, ni lalnu gdeete ne diidz gac miñe racladz xcuerp ne nu.

<sup>5</sup> Grëse zha ne mban zigne racladz xcuerp ngoopdol zho, loxaque grë miñ co rioxco zho; laa zha ne mban zigne racladz Espíritu Sant, miñe rnabey Espíritu Sant rioxco zho.

<sup>6</sup> Zha ne sca rioxco loxaque miñe racladz xcuerp ngoopdol zho, nëz ne nitlo zho ga zie zho; sangue zha ne rioxco miñe racladz Espíritu Sant, laa zho zie nëz ne yгаа zho tib guielmban; peet dzeb, peet zhgab ctsebdraa zho.

<sup>7</sup> Ni stiba, zha ne rioxco loxaque miñe racladz xcuerp ngoopdol zho, rlëënie zho Dios ga, sac nëd zho gban zho zigne rnabey xley me; ni niicle gacladzgaa zho, grieelod zho.

<sup>8</sup> Miñcocxe waa, ib rzacd zdoo Dios grë ncuaane run zho.

<sup>9</sup> Sangue to, mbandraa to zigne racladz xcuerp to, sinque laa to mban zigne racladz Espíritu Sant. Sca mban to, sac Espíritu Sant nacie to. Nanle to ganle zha ne nacie Espíritu Sant, nlid xnëz Jesús no zho.



10 Ni to ne nac to zha ne nole xnëz Jesús, ible zгаа to tib guielmban ndzon, sac laa Dios psilaale to lo dol. Nli zig nac xcuerp to, ncuaane nitlo naca, sac por dol biaan sca no gaca; sangue zhiespírituw, nitloda.

11 Dios bleeban Jesús, ni scagaa telne nli nacie to zhiEspíritu me, meque cueeban to.

12 Bets, bzian, nodne dziuun ne ncuaane racladz xcuerp ngoopdol ne, zig nac zeene pe nzëeb ne low.

13 Sac telne grë ncuaan co tsienal to, ible znitlo to; sangue telne gnab to gacniën Espíritu Sant to csaan tow, dzigo ible zгаа to tib guielmban.

14 Sac grëse zha ne zienal zigne racladz zhiEspíritu Dios, ga rlu ne nlipaa xpëed Dios nac zho.

15 Golguien ganle, laa Dios bneedz zhiEspíritu me lo to, sac xpëedle me nac to niina. Tsode to sca gdziebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibililadz gnee ne lo me guiab ne: “¡Papá yeen!”

16 Ni Espíritu coque runquien ne ne nli xpëed me nac ne.

17 Nana ne laa ne nacle xpëed Dios, scagaa dzigo ye ne ible zгаа ne grëtaa ncuaane bdeed me lo Jesús.

Nli zгаа ne lo grë guielndzon ne no Jesús ga, per scagaa none dzian ne grë guielnë niina ne laa ne ngab lo me.

### *Guielndzon ne naraa guiaad*

18 Guielnë ne dzian ne lo guidzliu rii, loxaque ne ngab ne lo Jesús, led ncuaane rnad ga; mazdraa nroobdoo nac lo guielndzon ne naraa dzian ne.

19 Zig nac grëtaa ncuaane bzaa Dios, masaque quiambëznëw gdziñ dze zeene laa grë zha ne nac xpëëd Dios ygaa lo guiełndzon co;

20-21 sac gon, gal dze co laa guidzliu guiaanmbe lo grëtaa ncuaan paat rquiind, lo grëtaa guiełntseeb ne no low niina. Dios bdeed diidz biaan grë ncuaan co low, per zeene gal dze co, zeene laa grë zha ne nac xpëëd Dios laa lo grëtaa guiełntseeb, yew laaw laa.

22 Laga quiambëz grë ncuaan co gdziñ dze co, masaque mban raca, rzaca zig rzac tib meñ wnaa ne quiayal xpëëd.

23 Ni ndion ne ganle, haxta ne, ne nac ne zha ne nacie Espíritu Sant (zeena glu ne ible zgaa ne grëtaa ncuaane gneedz me), mban rac ne quiambi-aaz ne gdziñ dze co, zeene laa Dios ctsëë xcuerp rii ne ni ycaania me ne zig xpëëdpaa me.

24 Ndion ne ible zbee Dios ne lo grëtaa ncuaane rac lo guidzliu rii, per nana laa ne quiambiaaz dzianpaa ne gaca. Tib ncuaane lëë ranle ne noyac, nod pe nacie yquiambëzraa new,

25 per zeene quiambëz ne tib ncuaane naraa gac, dzigo nodne guieed ne, sinque ine tiblque gac ne yquiambëz new.

26 Ni scagaa zeene lëbdraa ne, riendraa ne zha gun ne, Espíritu Sant nac meñ ne gacniñ ne. Zig nac zeene gzodiidznie ne Dios, tel nesew nanđ ne zhapaa nonguiel gnee ne lo Dios, dzigo Espíritu Sant ruñcee ne grë diidz ne riend ne zha nac.

27 Ni Dios ne nac me meñ ne nanpaa pe rza zdoo miech, rien me pe rnee Espíritu Sant, sac miñe racladz Dios gac miñ co rnab me.

*Tsod ncuane yquiaaqui csaanladz Jesús ne*

<sup>28</sup> Ndion ne ganle, zha ne nli dib zdoo rleynie Dios, zha ne rioxco gac grë mine racladz me, grëse ncuane rded zho, led lega rdete zhow, sinque no zaatne rquiina lo zho.

<sup>29</sup> Ni ndion ne ganle, zha ne nanle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac men roob.

<sup>30</sup> Ni grë zha co, laa me quiabedz zho, quiasilaa me zho lo dol, laa zho noyaanwen lo me; zeena ygaa zho lo guielndzon ne no me.

<sup>31</sup> ¡Zha nactaa ncuane lëe run Dios! Nana, tel scataa racnie Dios ne, ¿cho nadien grielo lega pe gun ne?

<sup>32</sup> Golgotsaa gwi ne ganle, haxta xpëed me bdeed me gut xcuent ne, grëse ne ne nac ne miech. Nana, ¿pe lel grë pe stib cos dzigo yquia zdoo me gneedz me lo ne?

<sup>33</sup> Ible Dios bzooblo ne, gacxe waa, ¡choot rieguald glisqui gnë lëda nodziun ne! Sac gon, Dioszhal psanmbe ne lo dol.

<sup>34</sup> ¡Choot rieguald ycaadz dol ne! Sac gon laa Jesús gutle bdiizh me xtol ne; per brieegan me, ni na laa me zob cue Dios zaatne riegual me nac me men non. Ga no me quianab me lo Dios por ne.

<sup>35</sup> ¡Tibaque rleynie Jesús ne! Zeene nodzian ne guielnë, zeene mban rac ne, zeene rtsidil miech ne, ib guiabd ne togo bod rleynied me ne. Niicle zeene guiegdga pe gow ne, guiegd pe gacwxab ne, o noxtseebgaa ne guet ne, ib guiabd ne togo psaanladz me ne. ¡Tibaque rleynie me ne!

<sup>36</sup> Ni zig nac xcuent guielgut, laaw raquetaque lo Xtiidz Dios, zaatne rnee:

Grëse no ne nac no zha ne ngab lo luu,  
tibaque noxtseeb no lo guielgut;

masaque rzac miech no zig rzac zho grë mëcwxiiil  
ne gollë guet.

<sup>37</sup> Niicxe peraa waa dieed ne, zdziuuñ ne gan low ni palal csañwinda ne, sac Jesús nacie ne; ni rleyniedox Jesús ne.

<sup>38</sup> Nanween naa tsod ncuaañe yquiaaqui csaanladz Dios ne:

per ni guielgut,

per ni guielmban,

per ni anjl,

per ni men̄dox,

per ni grë ncuaañe noyac niina, grëgaa ncuaañe naraa gaca.

<sup>39</sup> Niicle grë ncuaañe no glaa zhan gbaaw,  
niicle grë ncuaañe no guietraa zhan guidzliuw,  
niicle grëragaa ncuaañe bzaa Diosa.

¡Ni tiba ycada, sac tibaque rleynie Dios ne! Ni laaw blule me ganle, zeene pxeel me Jesús (men̄ ne rnabey ne), men̄ ne gut bdiizh grëse xtol̄ ne.

## 9

### *Ible Dios bzooblo zha Israel*

<sup>1-3</sup> Bets, bzian, ¡blactaa racladz naa guien grëraa zha Israel cho nac Jesús! Rquianë zdoo naa zho nac zho men̄ladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan̄ ganle rquiad zdoo naa naa niicle maase gdz-ibdee miech naa, maase nitlo naa guia naa zaatne

gan<sub>1</sub>draa naa Dios, tel<sub>1</sub>ne niaca por mi<sub>1</sub>n co laa zho guie<sub>1</sub>n zha gbig zho lo Dios.

<sup>4</sup> Blactaa quiayacnie<sub>1</sub>n Dios zho, ni rond zho xtiidz me. Bzoo<sub>1</sub>blo me zho gac zho zha ne ygab lo me, haxta bzë<sub>1</sub>nie me zho, go<sub>1</sub>n zho gan<sub>1</sub>le me<sub>1</sub>n ndzon nac me; biaa<sub>1</sub>n zho diidz grë zho me zha mod gu<sub>1</sub>nlay me zho. Psa<sub>1</sub>n me ley lo zho zee<sub>1</sub>na guie<sub>1</sub>n zho zha gban zho, ni psa<sub>1</sub>n me diidz lo zho zha gle<sub>1</sub>ynie zho me. Nzian grë ncuaa<sub>1</sub>ne bnee me gdeed me lo zho.

<sup>5</sup> Lëë pxozgoldoo zho ga goc Abraham, goc Isaac, goc Jacob, ni lo dii co ga briee<sub>1</sub>quia zha ne bded zig me<sub>1</sub>nlidz Jesús. Me nac Dios, me rnabey grë<sub>1</sub>taa ncuaa<sub>1</sub>ne no, ni me rie<sub>1</sub>guial<sub>1</sub> gacnon gzataa dze. Ible sca rie<sub>1</sub>guial<sub>1</sub>a.

<sup>6</sup> Nana, no zho guiab gocdaque grë mi<sub>1</sub>ne bnee Dios ga yгаа zha Israel. Per led scada. Sinque lëë mi<sub>1</sub>n co rgaa zha ne nli<sub>1</sub>paa rnalo Dios, sac zha co nac zha ne nli<sub>1</sub>paa nac zha Israel.

<sup>7</sup> Nacda ne loxaque ziaad zho lo xti<sub>1</sub> Abraham, laa zho nacle merpaa zha Israel; sac go<sub>1</sub>n, niicle ne nzian më<sub>1</sub>ed pquianie Abraham, per rë<sub>1</sub>b Dios loxaque Isaac gac cuent zig xpë<sub>1</sub>ed Abraham.

<sup>8</sup> Gase nagan<sub>1</sub>le rlu, zig nac niina, grë zha ne ziaad lo xti<sub>1</sub> Abraham, led grë<sub>1</sub>d zho ngab lo Dios; sinque zha ne bzoob<sub>1</sub>lole me zigne bzoob<sub>1</sub>lo me Isaac, zha co ngab lo me.

<sup>9</sup> Sac zig nac Isaac, ible Dios bnee lo Abraham gop Sar, ne laa Isaac gac më<sub>1</sub>ed lo zho.

<sup>10-11</sup> Ni scasaque xpë<sub>1</sub>ed Isaac. Bdzi<sub>1</sub>n dze, zeene laa Isaac ptsieel<sub>1</sub>nia wnaa ne lë Rebec, dzigo gop Rebec tibnë<sub>1</sub>z më<sub>1</sub>edbgui.

12 Bii zoney Rebec grop mëdyeen co, laa Dios bzooblöle win ne brieelë Jacob rëb me, ne ible Jacob gac zha non lo Esaú, win ne glo gal.

13-15 Laaw zhobneeque lo Xtiidz Dios, zaatne znu rëb me: “Ible Jacob bzooblo naa beenlay naa, bzoblod naa Esaú.” Gard gal grop mëed co, per ni gard gacna win zha nac guielntseeb, zha nacгаа guielwen, laa me bzooblöle tib win. Ga nagon, blu Dios ne mese nac men ne rieguial rzooblo tel cho zha ne ygab lo me, nacda por pe ncuane noyun zho.

Nana, ¿pe zdieets ne guielntseeb ga sca run Dios? ¡Led guielntseebda! Tib vuelt rëb me lo Moisés: “Zha ne gacladz naa yquia zdoo naa, squia zdoo naa zho.”

16 Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rgaaw, porne me rquia zdoo zho.

17 Gotsaa gwi ne ganle zha beenndip me zdoo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios.”

18 Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho.

19 Nana, no zho gnë: “Telne scaw, ¿pe nac dzigo rlisqui Dios mine run miech, tel mezhai rnabey zha nac zho tib tib zho?”

20 Per nana, ¿cho nac ne par glisqui ne mine run Dios? Zig nac tib guies ben, niacxe zlisquiw lo men ne bzaaw, guiaba: “¿Pe nacne znu bzaa luu naa?”

21 Led zha ne ruṅ dziin co, zrieelo gzaa zho tib guies zigne gacladztaa zho; tib lē beṅ ne xen zho, zac gzaa zhow tib guies niow, o gzaagaa zhow tib guies beelze.

22 Scaquegaa nagon rzac Dios miech. Grē zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiayap zho paciens nieeda gdziṅ dze co.

23-24 Grēgaa zha ne bzooblo me ygaa lo guielndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne.

25 Golsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grē zha ne nacd zha Israel ygab zho lo me, zeeṅa gleynie me zho niicle ne rleynied me zho glo.

26 Laa stib lugar bzeet Osé, zha bnee Dios lo zho, rēb me: “Ngabde to lo naa, per zdziṅ dze ne laa to gac xpēd naa, ne nac naa Dios nguiamban.”

27 Laa Isá stib men ne biadteed xtiidz Dios padzeela, zeeṅe bzeet me zha Israel rēb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios;

28 sac ziaadyoble guṅ Dios xquielwxtis me lo guidzliu, zigne bneele me.”

29 Miṅ co ga bzeet Isá mazd glo, rēb me: “Telne niaca miṅe yquiad zdoo Dios zha Israel, znitlo me zho grēse zho zigne bnitlo me zha Sodom ni zha Gomorr.”

*Zha ne nacd zha Israel laa zho wbig lo Dios*

<sup>30</sup> Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wlaltaa ib bioxcod zho dien zha nsilaa me zho lo dol.

<sup>31</sup> Laa zha Israel, niicle ne rioxco zho run zho grë mine rnabey ley parne csilaa me zho, per ib laad zho lo dol sca.

<sup>32</sup> Laad zho, sac zienied guic zho gnalo zho Dios, rzac zho por grë ncuaañe gunse zho laa zho laa lo dol. Mincoxe waa, zeene laa Jesús biaad, bzhaac zho me zig tib quie ne rriel ni ne riab ne liu.

<sup>33</sup> Lëë min co ga zhobnee lo Xtiedz Dios, zaatne rnee:

Sxel naa tib men lo zha Israel,  
me gac zig tib quie ne griel ni zho;  
sangue zha ne dib zdoo gnalo me,  
tsod dze ne tso zho guielñë, guiab zho pe nacne  
bnalo zho me.

## 10

<sup>1</sup> Bets, bzian, ne nlipaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grë xtol zho.

<sup>2</sup> Parga nli ran naa noxco zho gbig zho lo me; per rund zho mine no gun zho.

<sup>3</sup> Ib riend zho zdoo Dios ral rsilaa me miech lo dol, laa zho rzac por mine gun zho laa me csilaa zho. Ib nëd zho gun zho mine racladz Dios.

<sup>4</sup> Sac gon, laa Dios racladz Jesús gnalo zho zeena guiaanmbe zho lo grëse xtol zho; sac Jesússe nac men ne brieelo been grëse mine rnabey ley.

<sup>5</sup> Bzeet Moisés rëb me, zha ne gnalo ley ne lëew csilaa zho, none gun zho grëse mine rnabeya;



<sup>6</sup> sangue zha ne gnalo Jesús ne me csilaa zho, nacda dien peraa gun zho. Nacda ncuaane tso zho guiab zho, tebaa zha tsie zho lo me gbaa, gnab zho csilaa me zho (ncuaane gacda ga, dzigo rrieequia racladz zho quiet me ga stib);

<sup>7</sup> o guiaabgaa zho tsie zho zaatne noliu gre ngutoo, tsienab zho lo me csilaa me zho (ncuaane gacdaque ga, ni stiba led gad no me, laa me brieebanle).

<sup>8</sup> Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambez me csilaa me zho. Min co nac mine noseed no miech, rnee no lo zho:

<sup>9</sup> Zha ne cueero guiab zho Jesús nac men ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo gre xtol zho.

<sup>10</sup> Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac mine rililadz ne, dzigo scaania me ne.

<sup>11</sup> Rnee lo Xtiidz me: “Zha ne dib zdoo gliladz Jesús, quitnied me zho.”

<sup>12</sup> Grese miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grese zho, ni gretaa ncuaane rap me, zdeed mew lo zha ne gnaba lo me.

<sup>13</sup> Rnee lo Xtiidz me: “Grese zha ne gnab lo Dios csilaa me zho lo dol, ible silaa me zho.”

<sup>14-15</sup> Nana, no zho gnë: ¿Per zha gnab zho lo me, ni runbeyd zho me? Nli gunbeyd zho me, tel niaca mine gard cho cxeel zha ne tsienee Xtiidz me lo zho, parne gon zho cho nac me. Ni min co

rzeet Isá, zeene rëb me: “¡Zha wentaa ziaad zha ne ziaadnie Xtiidz Ndzon Dios!”

<sup>16</sup> Rgaaz Xtiidz Dios, per led grëd zho rzoobdi-aga, zig rbiireque Isá, rnee me: “Dios, bui ganle choot nêd gliladz Xtiidz luu, miñe rne naa.”

<sup>17</sup> Sac gon, parne dib zdoos ne gnalo ne Dios, ib none yquiaadiag ne Xtiidz me ganle cho nac Jesús.

<sup>18</sup> Zig nac zha Israel, ¿niacxe gard gon zho Xtiidz Dios? ¡Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiaay-acnañ Xtiidz me.

<sup>19</sup> No hor rne naa: ¿Pe ib riend zha Israel, telne gbigd zho lo me csilaa me zho, laa me csilaa miech stib guiedz? ¡Per rienle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet riend; zeena tednë zdoos zha Israel, togo ziaa zho biini.

<sup>20</sup> Miñcoque ga pquiaa Isá, zeene rëb Dios: Grë miech ne ni zienied guic yguib zho naa, laa zho beenbey naa.

<sup>21</sup> Laa zha Israel, blactaa bzëëb nia naa lo zho ni naa niacnie naa zho, per pa nion zho xtidz naa, lel gocntseeb zho lo naa.

## 11

### *Zha Israel ne wbig lo Dios*

<sup>1</sup> Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa;

<sup>2</sup> dzigo led psaanladzd Dios zho (nac zho zha ne padzeelale bzooblo me ygab lo me).

Go|soladz gan|le, zha rëb Dios lo Lí, men ne bi-  
adteed xtiidz Dios padzeela, zeene bzodiidznie Lí  
Dios

<sup>3</sup> grëtaa ncuaane noyun zha Israel, ptsil zho  
zaatne riegan grë miech me, beet zho grë zha ne  
pxeel me noteed xtiidz me, ni laa zho quiana|aque  
gut zho Lí. Rzac Lí guiendraa zha ne ron xtiidz me,

<sup>4</sup> dzigo hor co rëb me lo Lí: “Led tibd luu riaan,  
no zgadz mil zha ne gard yquiitsgzhib lo Baal, naa  
bzooblo zho ygab zho lo naa.”

<sup>5</sup> Scaquegaa niina nagon led grëd zha Israel  
psaanladz Dios, no palal zha ne pquia zdoo me ble  
me zho ygab zho lo me.

<sup>6</sup> Rne naa pquia zdoo me zho, sac guiabd ne togo  
por demas wen zho gane ble me zho; sac gon, tel  
por wen zhow, nlid dzigo ne rquia zdoo me zho.

<sup>7</sup> Znu nagon naca: Zha Israel ne bzooblele me,  
zha cose guiaanwen lo me. Laa los demas zho, lel  
lozh gacndip zdoo zho,

<sup>8</sup> zigne zhobneeque lo Xtiidz me, zaatne rnee:  
“Been|ndip Dios zdoo zho, riend zho zha gbig zho  
lo me; niicle ne zob lo zho, per rac zho zig rac zha  
ne rand; niicle zob diag zho, per rac zho zig rac zha  
ne peet rond. Ni scataque nac zho haxta lo nadze.”

<sup>9</sup> Miñcoque bzeet rey David, zeene rëb me:  
Lëëque grë zhilni zho, lëëque grë ncuaane row zho,  
gac zig len doo ne, len guiex ne tsietsobe  
zho;

zeena ygaa zho guie|në ne riegua|l zho.

<sup>10</sup> Guiaan zho zig tib zha ne ro|d lo,  
guiaan zho zig tib zha ne blozh blengw zhits.

*Psilaa Dios zha ne nacd zha Israel*

11 Grë zha Israel ne sca gocndip zdoo, guiabde to togo laa zho bnitlole ga. ¡Lëda! Sinque laa me bdeed diidz sca goc zho, zeena gbig grë zha stib guiedz lo me csilaa me zho lo xtol zho; ni tednëgaa zdoo zho gan zho laa me rcaania zha stib guiedz.

12 Nana, telne scataa guielnzaac ne bgaa miech stib guiedz ne znu racndip zdoo zha Israel, ¿pe lelque dzigo zeene laa zho gbiire guiaanwen lo Dios stib? ¡Zha naczhe grëraa guielnzaac ne ygaa miech!

13 To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdoo naa rioxco naa run naaw,

14 zeena togo soobladz palal zha ladz naa ye zho squi gbig lo Dios csilaa me zho lo xtol zho.

15 ¡Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ¡tib guielbley nrooba zeene laa me ycaania zha Israel stib! Sac gon, rrieequia grieeban zho ga.

16 Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa.

17 Bdzin dze brug palal zhicwa, dzigo ga bguiid zhicw yag oliv dan; lëë yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guielnzaac co.

18 Lëëraasi, guiabde to togo nonraa to lo zha ne nac zhicwa miñe brug ga. Golguien ganle, por lo yag ndaan zhicwa.

19 Nana, nend guiab to: “Per rioguiäl now, gacxe waa no biaan xlugar zhicwa, miñe brug ga.”

20 ¡Golgap cuidad gon! Nli lëë biche zho, laa to biaan xlugar zho, porne bnöd zho nalo zho Dios zigne bien to rnalo to me; per golguien gacniatsde to.

21 Golgan ganle, niicxe zha name zhicwpaa yag co nac zho ni ptiche me zho, ¡pelel to dzigo!

22 Golwi ganle zha wentaa Dios, per scagaa rdziladz me gats xtiidz me. Mincoxe waa gondez me grë zha co, laa to gon wen goc me lo to. Lëëraasi none gon to miñe rnabey me, sac gon telne gonde tow, scaque gandzed me to.

23 Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios!

24 Niicxe to na, nac to zig yag oliv dan, pquia zdoo me to pquiid me to zhicw yag oliv wen co, ¡pelel zha Israel dzigo yquiad zdoo me, gbiire yquiid me zho lo yag ne nacpaa zho!

### *Scaania Dios zha Israel ne bzozit lo me ga*

25 Bets, bzian, laa naa gni lo to ganle zha nac miñe no guic Dios gun me. Niicle ne rienð miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdoo zozit zho lo me niina, per zeene laa grë miech stib guiedz blozh wbig lo me,

<sup>26</sup> hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeeṇe rëb zho:

Guiedz Sión, ga griee meṇ ne cuee zha Israel lo xquieṇtseeb zho.

<sup>27</sup> Dzigo laa Dios csilaa zho lo grëtaa xtol zho, zigne psanle me diidz lo zho.

<sup>28</sup> Leṇ dze rii rlëë zha Israel ron zho none gnalo zho Jesús, par laa zho lo dol. Znu rac zho zeeṇa gdeeda diidz gbig to lo Dios, nac to zha stib guiedz; sanḡue Dios rleynie me zho, sac scale rëb me lo grë pxozgol zho.

<sup>29</sup> Me bzooblo zho, dzigo ible scaania me zho; sac goṇ, led yed me ctsëë xtiidz.

<sup>30-31</sup> Glo to nac zha ne ib bind xtiidz Dios, laa niinagaa na zha Israel nëd gon xtiidz me. Per zigne rquia zdoo me to niina, scaquegaa zdziṇ dze ne yquia zdoo me zho.

<sup>32</sup> Grëse miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeeṇa grieeṇo glu me ganle ne lalga rquia zdoo me ne.

<sup>33</sup> ¡Gotsaa gwi ganle zha meṇ nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¿Cho grieeṇo guieṇ pe nac miṇe no guic me guṇ me, pe nacgaa guṇ mew?

<sup>34</sup> Zigne zhobneeque lo Xtiidz me, zaatne rnee: “¡Choot naṇd pe no guic Dios guṇ me! ¡Choot grieelod guiab lo me, znu znu been!

<sup>35</sup> Wlaltaa choot gard pe gdeed lo Dios, par guiab ne laa Dios zëëb.”

<sup>36</sup> ¡Peet goṇ nzëëbd Dios lo miech! Sac grëtaa ncuaaṇe no, me psanṇa, me naaza, ni me rnabeya.

¡Mese nac men ndzon, tibaque gotsaa dziuunnon ne me! Sca rieguiala.

## 12

### *Golban zigne rdziladz Dios*

<sup>1</sup> Bets, bzian, laa to gocnanle ganle pa lotaa nquialadz Dios to. Nana sca, dib nase to golsan to ladznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

<sup>2</sup> Ib tsienaldraa to grë ncuane ndzinlid ne noyac lo guidzliu rii, grëse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

<sup>3</sup> Ne znu nac naa zha ne pquia zdoo Dios noyun naa dziin rii, nligaa laa naa rso diidz lo to, ndzinli golgac, ib glude to ncuane ni nade to, sinque golguien cho nac to, zha rnalo to Dios.

<sup>4-5</sup> Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

<sup>6</sup> Tib tib ne bneedzse Dios guielbiini lo ne, par grieelo dziuun ne dziin ne pso me ne dziuun ne lo me. Gacxe waa, zha ne pso me cteed xtiidz me, none gnee zhow zigne csiaab mew guic zho;

<sup>7</sup> zha ne pso me gun ncuane yquiin lo grëraa miech, none gun zhow.

Zha ne pso me cseed miech, none min co gun zho;

8 zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho; zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

9 Dib zdoo to golleynie samiech to. Gandzede to grē ncuaane ntseeb, niapse ncuaane rquiin goltsienal.

10 Ine niowse golleynie grē zha ne nacgrē to, gacnguizhde to, quitniede to zho.

11 Nguieel golgac, gacmbechde to, dib zdoo to goltsoxco golgun mine nac xtsiin Dios.

12 Nley golgac lo guielmban rii, golsoladz ganle zha nactaa grē ncuaane no gneedz Dios lo to; golxecw lo grē guielnē ne gan to; tibaque golzodiidznie Dios.

13 Goltsoxco xliaadz grē zha ne nacgrē to ngab to lo Dios; zaacse golcuēzlo zha ne ziaadted lidz to.

14 Grē zha ne rtsidil to, laa ne gdzibdee to zho, golnab gunlay Dios zho.

15 Zha ne no guielbley, golgacnie zho lo xquielbley zho; zha ne nogaa guielnē, golgacnie zho lo xquielnē zho.

16 Gacniatsde to. Grē zha ne rzac miech peet nond, goltsieelsa zho; guiabde to to nac zha ne racraa. Niowse golbannie zha ne nacgrē to.

17 Zha ne csacsi to, gunde to ne yeque to csacsi zho. Goltsoxco wen golgac lo grēse miech.

18 Tilniede to samiech to, goltsoxco tibaque wen golbannie zho.



<sup>19</sup> Gol<sub>g</sub>uien<sub>1</sub>, zha ne csacsi to, ib guiabde to ne tozhal ctsire guie<sub>l</sub>nē co, sinque gol<sub>s</sub>ana ladznia Dios, metaa nan zha gun<sub>1</sub> me xquie<sub>l</sub>wxtis me; zigne ziaad lo Xtiidz me zeene rēb me: “Naa raguial<sub>1</sub> gun<sub>1</sub> guie<sub>l</sub>wxtis, naa gun<sub>1</sub>quizh miech tel<sub>1</sub> pe nac dol<sub>1</sub> ne zēēb zho.

<sup>20</sup> Gacxe waa, zha ne rlēē lo luu, zeene gan<sub>1</sub> luu mban rac zho rcaabedz zho, mazd bdeed ncuaane gow zho; gan<sub>g</sub>aa luu mban rac zho rnab zhis zho, bdeed ncuaane guie zho. Sac zeene sca gun<sub>1</sub> luu, stoladz zho csoladz zho mine been<sub>1</sub> zho luu; rrieequia gui ga cuib guic zho.”

<sup>21</sup> Gol<sub>g</sub>uien<sub>1</sub> sca, niapse guie<sub>l</sub>wen gol<sub>t</sub>sienal<sub>1</sub>, zeena sca ycuēēz to lo guie<sub>l</sub>ntseeb. Gdeete to diidz ne ye to gun<sub>1</sub> guie<sub>l</sub>ntseeb.

## 13

### *Gol<sub>g</sub>on mine rnabey wxtis*

<sup>1</sup> Grēse to none gon to xtiidz zha ne nacpaa wxtis. Sac grēse zha ne nac wxtis, ible Dios rdeed diidz ne laa zho rac dziin co.

<sup>2</sup> Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lēēque zha rguib ted zho caxtigw ga.

<sup>3</sup> Gol<sub>g</sub>an<sub>1</sub> gan<sub>1</sub>le, ible laa wxtis zo, par zha cobey caxtigw ne tsieguial<sub>1</sub> zha ntseeb. Tel<sub>1</sub>ne racladzde to sca tsoxtseeb to lo wxtis, zaacse gol<sub>g</sub>ac; scagaa zha, tsod pe nacne ygaal<sub>1</sub> zho to.

<sup>4</sup> Dios psan<sub>1</sub> rzo zho ni zha rteedlo to, ni scagaa, tel<sub>1</sub>ne pe guie<sub>l</sub>ntseeb ne gun<sub>1</sub> to, zhaque gnabey pe caxtigw ne ygaa to; sac gon<sub>1</sub>, ible laa Dios bzo zho gun<sub>1</sub> zho guie<sub>l</sub>wxtis.

<sup>5</sup> Gacxe waa, ib none gon to mi<sub>ne</sub> rnabey zho, zeena tsoxtseebde to lo zho, ni scagaa niicle nēz lo Diosa i<sub>ne</sub> tiblise no guic to.

<sup>6</sup> Scaque dimi ne no gdeed to lo zho, go<sub>l</sub>deeda; sac rquiin dimi co parne grieelo gu<sub>n</sub> zho te<sub>l</sub> pe nac dziin ne no gu<sub>n</sub> zho.

<sup>7</sup> Go<sub>l</sub>guien sca, dimi ne no gdeed to lo zho, go<sub>l</sub>deeda; mi<sub>ne</sub> rnabey zho to gu<sub>n</sub> to, go<sub>l</sub>gu<sub>n</sub>a. Go<sub>l</sub>leynie zho, quitniede to zho, go<sub>l</sub>guien zha non nac zho.

### *Go<sub>l</sub>leynie samiech to*

<sup>8</sup> Grē ncuaa<sub>ne</sub> riegua<sub>l</sub> to gu<sub>n</sub> to, go<sub>l</sub>gun<sub>g</sub>azha zeena bdedgaw; sa<sub>n</sub>gue samiech to, none tibaque gley<sub>nie</sub> to zho. Zha ne rley<sub>nie</sub> samiech, grēle mi<sub>ne</sub> zhobnee lo Xley Dios ga quia<sub>y</sub>u<sub>n</sub> zho.

<sup>9</sup> Sac te<sub>l</sub>ne rley<sub>nie</sub> to samiech to zigne rley<sub>nie</sub> to to, nod pe nacne csacsi to zho; guiab to:

laa to yquidie zho,

laa to gut zho,

laa to cuan zho,

laa to tsonie tsieel zho,

gzoobladzgaa to grē ncuaa<sub>ne</sub> quianie zho.

Gacxe waa, zha ne rley<sub>nie</sub> samiech zigne rley<sub>nie</sub> zho zho, grēle mi<sub>ne</sub> zhobnee lo Xley Dios ga quia<sub>y</sub>u<sub>n</sub> zho.

<sup>10</sup> Zha ne rley<sub>nie</sub> samiech, rsacsidraa zho zho; ni mi<sub>n</sub> co rnabey Dios. Gacxe waa, grēse ne none gley<sub>nie</sub> ne samiech ne.

<sup>11</sup> Ib none gban ne zigne racladz Dios, go<sub>l</sub>le na tsa<sub>a</sub> ne biini; sac go<sub>n</sub>, laa dze ne ycaania Dios ne bii ziaadgaxraa, lēdle zeene psilo rnal<sub>o</sub> ne me.

<sup>12</sup> Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne miñe racladz menox, sinque miñe racladz Dios, miñ co golgotsaa dziuun ne.

<sup>13</sup> None ndzinli gban ne:

dziuund ne guielgonziu,  
 dziuund ne grë lni yozh,  
 yquiangobd ne zha ne led tsieeld ne,  
 dziuund ne grë guielyozh ne racladz xcuerp ne,  
 dilnied ne samiech,  
 glëenied ne zho zeeñe stib noded zho.

<sup>14</sup> Golgotsaa gnab ne lo Jesús sca, zig zie dze lozh csañmbe me xquielrien ne, csañmbe me zdoo ne, gac ne zigne racladz me. Dziuundraa ne grë ncuaañe ndzinlid ne racladz xcuerp ne.

## 14

### *Gzeed zdoo to miñe run zha ne nacgrë to*

<sup>1</sup> Golcaania zha ne gard tsoguicpaa zha nac Xtiidz Dios. Telne no palal miñe rliladz to zhaa rzac zho, glisquide tow lo zho.

<sup>2</sup> Gzoob ne, no to rzac peet nacda gow to grë lose guielwagw, laa zha ne na gard tsoguicpaa Xtiidz Dios, rzacгаа wena telne scuaan guizhyese gow zho;

<sup>3</sup> ga nagon, ni stib ni stib nod pe nacne glisqui dien cho pe row, dien cho pe rowdгаа; sac gon grëse to, Dios bzooblo to ngab to lo me.

<sup>4</sup> Nana zig nac zho, lo Dios ngab zho, led lode tow; ¿cho nac to dzigo tso to glisqui to dien pe run zho? Dios nac men ne nan telne lëew o lëdgaaw ga quiayun zho; men nroob nac Dios, me gdeed

guielbiini lo zho guien zho gban zho zigne racladz me.

<sup>5</sup> Scaque, no zho zienal dien pa dzepaa none gleynie zho Dios, nogaa zho rnee zac tel pa dzetaa gleynie zho me. Per peet nacd ga, zac tib tib zho gunse zho mine rzac zho rdziladz me.

<sup>6</sup> Tel pa dzetaa wena, totsaque run zhow par gunnon zho me. Scaquegaa guielwagw, wena zha ne gow grelosew; niicle zha ne ncueegaa ncuane gow, wenaquew, totsaque run zhow par glu zho ne rleynie zho me, ni rdeed zho xquizh lo me.

<sup>7-8</sup> Sca nagon naca, per led min cod dzieets ne dziuun ne mine gacladztaa ne. Grese ne ne nac ne zha ne ngab lo Dios, laa ne mban par dziuun ne mine rnabey Jesus, ni zeene guetgaa ne, lo me none gdzin ne. Gacxe waa, niicle niina ne zomban new, niicle zeene gutlegaa new, ladznia me no ne.

<sup>9</sup> Sac gon, tel Jesus gut me ni brieaban me; gacxe waa, me rnabey ne grese ne, zigtaa zha mbana zigtagaa zha guta.

<sup>10</sup> Jesus rnabey ne tib tib ne. Gacxe waa, nonguielda glisqui to lo zha ne rund mine run to; nonguielda por mincose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grese ne laa ne none gacredz lo me.

<sup>11</sup> Zigne raquietaque lo Xtiidz me, zaatne rnee me:

Naa nac Dios mban, gneli naa lo to ganle:  
grese miech, ible squitsgzhib zho lo naa,  
cueero zho ne nli naa nac Dios.

<sup>12</sup> Sca nagon gaca, tib tib ne ib laa ne no cueero lo me tel zha wban ne.

*Csaṅde to zdoo zha ne nacgrë to*

13 Nana sca, zha ne sca runḁ grë miṅe runḁ to, ible glisquidraa tow lo zho. Golḁuienḁ, gunde to ncuaane rgobey to yquiaaqui gunḁtal zho xtolḁ zho, o csaangaa zho Xtiidz Dios.

14 Telḁ naa, nanḁpaa naa led dolḁda gow ne grë lose guielḁwagw; sac niicle Jesúsa scaque nac xtiidz me. Saṅgue zha ne rzac dolḁ, mazd gowd zhow; sac telḁ laa zho gowa, xtolḁ zho ga gunḁtal zho.

15 Zig rne naa ga led dolḁda, per telḁne xtsiinḁpaa row to tib ncuaane rquiaaqui rsaṅ to zdoo stib zho, ga rlu to ne rleyniede to zho. ¡Golḁuienḁ sca, gowde to ncuaane yquiaaqui sozit zho lo Dios! Sac gonḁ, blactaa guielḁnë ne bded Jesús psilaa me zho.

16 Ib gunde to grë ncuaane yquiaaqui gneenë miech to, niicle ne nanḁpaa to led dolḁda.

17 Zha ne ngab lo Dios, miṅe none tsienie guic zho nac ne ndzinli gban zho, tilḁnied zho samiech zho, inḁ nley gac zho (miṅ co nac miṅe rdeed Espíritu Sant); led tsod zho dieṅ pe zac gow zho, pe zac guie zho, pegaa gacda.

18 Sca rdziladz Jesús, ni zha ne sca gban, zleynie Dios zho, niiclegaa grë miecha zleynie zho zho.

19 Golḁtsoxco sca, gunde to ncuaane codilḁ to grë zha ne nacgrë to; zeṅḁa tipse gac to lozh tsoguic to zha racladz Dios gban to.

20 Ib gunde to, ne por tib guielḁwagw codilḁ to grë zha ne ngable lo Dios. Zig rnele naa ga, grëlose guielḁwagw mbew, peet nacda gow new; sinque miṅe nonguielḁda, nacne gow ne miṅe nanḁpaa ne yquiaaqui csaṅ ne zdoo stib zho.

21 Min̄cocxe waa, mazd gowde to pe scuaan bēēl, guiede to nziu, tel̄ne min̄ co yquiaaqui gun̄ctal to xtol̄ zho; ni tel̄ pe grēraa ncuaane nan̄ to tsod zdoo zho, gunde tow.

22 Niicle ncuaane nan̄paa to dolda gun̄ tow, ni-iclegaa nēz lo Diosa led dolda; per mazd gunde tow zeēne zo zha ne rzac dola. ¡Wen zie zha ne sca niicle nan̄paa zho dold nac min̄e gun̄ zho, per run̄d zhow, parne gun̄ctald zho xtol̄ zho!

23 Saṅgue zha ne racchop guic rien̄d zho dien̄ pe zow zho tib guiel̄wagw, ni lozh ga row zhow, run̄ctal zho xtol̄ zho ga; sac beend̄ zho min̄e rzac zho rdziladz Dios. Grēse ncuaane rzactaa zho wend ni gun̄ zhow, xtol̄ zho ga gun̄ctal zho.

## 15

### *Gol̄gacnie zha ne nacgrē to*

1-2 Gol̄guien̄ sca, to ne nac to zha ne dziitsle zo lo Xtiidz Dios, gol̄gacnie grē zha ne gard sodziits lo Xtiidz me. Gol̄gun̄ ncuaane tso zdoo zho, ncuaane yquiin lo zho, zeēna lozh guien̄ zho zha gnalo zho Dios; led tsode to gun̄ to ncuaane yquiinse lo to.

3 Gol̄gan̄ gan̄le, niicle Jesúsa bguibd me niac ncuaane nquiin lo me. Zigne raquietaque lo Xtiidz Dios, zaatne rnee: “Grētaa diidznē ne rnee zha ne rlēē lo Dios, grēsew pcon zho me.”

4 Grēse min̄e raquiet lo Xtiidz Dios, padzeela pquiaw; ni ib laaw pquia zeēna gacndion̄ ne zha no gban ne. Lēew rnee none nley gac ne, lēew rnee guieete ne yquiambiaaz ne yгаа ne grē min̄e bzeetle Dios.

5 Dios men̄ ne rneedz guiel̄bley co, men̄ ne rac-nien̄ ne guieete ne, me gacnien̄ to niowse gbannie

to grë zha ne nacgrë to. Golleynie zho zigne rleynie Jesús to,

<sup>6</sup> zeena grëse ne tipse gac ne dzioolnie ne Dios, PxoZ Jesús, men ndzon ne rnabey ne.

*Grëse miech noyon Xtiidz Ndzon Jesús*

<sup>7</sup> Golguien sca, grëse zha ne nacgrë to, golcaania zho zigne pcaania Jesús to. Sca golgun, zeena xoobnenraa lë Dios.

<sup>8</sup> Golsoladz ganle, zeene biaad Jesús nroob ncuane been me lo zha Israel, me biaadgun grëtaa mine bzeetle Dios padzeela. Ga blu Jesús grëse mine rnee Dios, ib run mew.

<sup>9</sup> Ni golsoladz ganle, ye grë miech stib guiedz biaadsilaa me, gane niina grëse zho roolnie Dios, ne scataa pquia zdoo me zho. Min co raquiet lo Xtiidz me, zaatne rnee:

Zoolnie naa luu,  
ni zlu naa lo grë zha stib guiedz ne men non nac luu.

<sup>10</sup> Stib lugar rnee:

To ne nac to miech stib guiedz,  
jine nley gulgac grë to zha Israel!

<sup>11</sup> Ni no stib zaatne rnee:  
Grëse to ne nac to miech stib guiedz,  
jolleynie Dios! jolsanziiu lë me!

<sup>12</sup> Mincoque ga bzeet Isá, zeene znu pquiaa me:  
Zriequia tib men lo xtii Isá;  
men co gnabey lo grëse miech stib guiedz,  
ni me gnalo zho grëse zho.

<sup>13</sup> Mincoxe waa, to ne nac to miech stib guiedz,  
rnab naa lo Dios (men ne psanle diidz pe nac grë ncuane ygaa ne ga) gneedz me guiebley lo to,  
gacnie me to peet zhgab ctsebde to niina ne laa

to rliidzle me. Rnab naa lo me, gacniēn Espíritu Sant to inē gley to yquiambēz to gac grē miñe psanle me diidz ga.

<sup>14</sup> Bets, bzian, nanle naa zha wen nac to, nacde to zha ne csan zdoo stib zho; rienle to zha racladz Dios gban to, rienle to zha cso to diidz lo grē zha ne nacgrē to;

<sup>15</sup> per lo guits rii gon nzian ncuaane rso naa diidz lo to. Guiabde to togo ndox naa lo to, sinque laaw beñ naa zeena guiaanladzde tow.

<sup>16</sup> Ne nquialadz Dios naa, laa me bzooblo naa noyun naa xtsiin Jesús, none naa Xtiidz Ndzon me lo grē miech stib guiedz, zeena csanmbe Espíritu Sant zho; lozh ga gded naa zho lo Dios zig tib gon ne gley me ycaania me.

<sup>17</sup> Gacxe waa, tel niina rley naa sac noyacniēn Jesús naa noyun naa dziin ne pso Dios naa.

<sup>18</sup> Me noyacniēn naa none naa Xtiidz me lo grē zha stib guiedz, zeena gban zho zigne racladz me. Ni laa zho nobig lo me, sac ran zho grēse miñe rne naa mban naaw zigne naca,

<sup>19</sup> ni ran zho zha racniēn Espíritu Sant naa run naa grē milagr, grē ncuaane rzee zdoo zho. Sca nagon none naa Xtiidz Jesús lo zho, brie naa Jerusalén briequia naa haxta nēz xtan zha Ilir. Guiabde to togo rtix naa diidz.

<sup>20</sup> Ni laa naa noxco za naa zaatne wlaltaa gard gon zho cho nac Jesús, zeena gasēēbd naa zaatne ziyele zha ne güeynee Xtiidz me.

<sup>21</sup> Laa naa zanał zigne zhobnee lo Xtiidz Dios, zaatne rnee: “Grē zha ne wlaltaa gard gon cho nac me, zeene gan zho grētaa ncuaane run me, laa zho gunbey me.”



*Racladz Pabl tsie Pabl Roma*

<sup>22</sup> Nzian vuelt gocladz naa nialgaṅ naa to, per ib bdeetew diidz, sac laa naa bia grë dan co biaseed naa miech.

<sup>23</sup> Izle ga na tibaque sca no guic naa, laa niina ne laa naa psiaal lo xtsin naa, nataa nagon ible zial naa.

<sup>24</sup> Laa naa no ga Spañ, dzigo lëe nëzle ga teed naa Roma i guialgaṅ naa to. Tib guielbleya lo naa guialquiabdiuuzh naa to, dzigo lozh ga siguiel to gūn to xyudar naa grieelo ga naa nëz Spañ.

<sup>25</sup> Laa niina, laa naa no ga Jerusalén gasaṅ naa tib gon lo grë zha bets, zha bzian ne no ga;

<sup>26</sup> sac grë zha bets, zha bzian, ne no nëz Macedon, ni nëz Acay, laa zho bnediidz been lo zho palal dimi cxeel zho yquiin grë zha prob ne no nëz co.

<sup>27</sup> Niapse zdoo zho gol ptop zho gon co, sac rzac zdoo zho grëta minë been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeel palal ncuaane rgaa lo zho yquiin zha Jerusalén.

<sup>28</sup> Zigne lozh nagon gasaṅ naa gon co Jerusalén, dzigo laa naa teed guialgaṅ naa to i zigne nile naa ga.

<sup>29</sup> Rien naa nroob guielnzaac ne gneedz Dios lo to zeene laa naa guial.

<sup>30</sup> Bets, bzian, golguien ganle Jesús rnabey ne grë ne; ni rleynie ne zha ne nacgrë ne, sac Espíritu Sant nacie ne. Gane niina, laa naa rnab lo to, golgotsaa gnab ne lo Dios gacniën me naa;

<sup>31</sup> golnab lo me, csilaa me naa ladznia grë zha Israel ne gard guien cho nac Jesús. Gólnab lo me,

ine gley grë zha bets ne, zha bzian ne, ycaania zho gon ne gasan naa lo zho nu;

<sup>32</sup> zeeṇa ine nley no zdoo naa glanso naa lo to, ine gdziiladz naa leṇ dze ne cuëz naa lo to i. Sca nagon no guic naa, totsaque gneedz Dios diidz gaca.

<sup>33</sup> Ni me ne nac me meṇ ne rbee miech lo grëse zhgab, lo grëse guielxtseeb, me gacnieṇ to. Sca gaca.

## 16

### *Bdiuzh*

<sup>1</sup> Bets, bzian, leṇ dze rii laa Feb, tib wnaa ne run xtsiin Dios guiedz Cencré, laa me guiaad nëz lo to i.

<sup>2</sup> Laa naa rso diidz lo to, zeeṇe glanso me i niowse golcaania me, golcaania me zigne riegual ycaania ne zha ne ngab lo Dios. Golsiguiel goldeed grë ncuane yquiin me; sac gon, tel me ndal grë zha ne ziyacnie me lo xliadz zho, haxta naa blactaa ziyacnie me naa.

<sup>3</sup> Ni rnab naa lo to, golsiguiel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tsiel me Priscil. Blactaa ziyacnie zho naa zidziun no xtsiin Jesús,

<sup>4</sup> haxta bdedlaa zho niet zho psilaa zho naa lo guielgut. Rzadox zdoo naa mine been zho ga, niicle grëragaa zha zit ne nacgrë new, rzac zdoo zhow.

<sup>5</sup> Ni scagaa, grë zha ne rcaalsa lidz zho riegoolnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëe me nac zha Asia ne glopaa bzëeb xnëz Jesús.

<sup>6</sup> Goldeed zhibdiuzh naa lo Marí, blactaa noyun me xtsiin Jesús lo to.

<sup>7</sup> Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguiib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

<sup>8</sup> Goldeed zhibdiuzh naa lo Ampliat, lëë stib zha ne rdzieel xtidz naa ga;

<sup>9</sup> lo Urban, rsoladz naa me, tipse bdziuun no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho;

<sup>10</sup> lo Apel, ye me blactaa ncuaane bded me blu me ganle ne nli dib zdoo me rnalo me Jesús; lo grë zha ne no lidz Ristob ne.

<sup>11</sup> Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne rliladzle Jesús;

<sup>12</sup> lo Trifen, lo Trifós, ni lo Pérsida, gza menn wnaa rii blactaa noyun zho xtsiin Jesús.

<sup>13</sup> Goldeed zhibdiuzh naa lo Ruf, zëëb xtidz me lo grë zha ne nacgrë ne; goldeed zhibdiuzh naa lo xn<sup>i</sup>aa me ne, run naa cuent lëë stib xn<sup>i</sup>a naa ga, blactaa pteedlo me naa.

<sup>14</sup> Goldeed zhibdiuzh naa lo Asíntric, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

<sup>15</sup> Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

<sup>16</sup> Grëse to bets, grëse to bzian, golcaania zhibdiuzh naa. Grëse zha ne rliladz Jesús nëz rii, laa zho rxeel bdiuzh lo to.

17 Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gungüet zho to, rlu zho mine ni nacdraa Xtiidz Jesús; yquiaadiagde to zhiwseed zho.

18 Grë zha co, led xtsiindraa Jesús ga run zho, sinque laa zho noxco ncuaane gdeed guxt xcuerp zho. Diidz nex, diidz ndooladz rnee zho; grë miech ne beelze pe rililadz, znuse rquidie zho zho.

19 Sañgue to, zëëb diidz ne ib rsaande to mine nac Xtiidz Dios, zianał to mine rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuaane yquiin gun to, ni lalnu tsoode to lo guiełntseeb.

20 Scagaa Dios men ne rtiche grëse zhgab, grëse dzeb, merle quixdze me Satanás, zeena peet grielodraa gun ma. Jesús, men ndzon ne rnabey ne, me gacnien to.

21 Golcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

22 (Naa nac Ters, naa noquia guits rii, ye naa laa naa rxeł zhibdiuzh naa lo to i. Rleynie naa to, sac ye to ngab lo Jesús.

23 Golcaania zhibdiuzh Gay, men ne rbëz naa lidz, laa me rxeel bdiuzh lo to. Lidz me nu rcaalsa grë zha ne rililadz Jesús nëz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to.

24 Jesús men ne rnabey ne, me gacnien to grëse to. Sca gaca.)

<sup>25</sup> Laa naa rsaṅ to ladznia Dios, me gacniē to lozh sodziits to lo Xtiidz me, miñe none naa lo miech. Haxta zeēne gard tsaa guidzliu, znu no guic Dios csilaa me grē miech lo xtoḷ zho, per choot gocnaṅda, naraa laaw bzhoobneṅ.

<sup>26</sup> Laa niina, nzian zaatne nogaaz Xtiidz me, zeēna grēse zho guieṅ Jesús none gnalo zho, ni miñe rnabey me miñ co no guṅ zho. Grē zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca.

<sup>27</sup> ¡Mese nac Dios, mese nac meṅ ne nlipaa rien!  
¡Tibaque sca golgotsaa dziuunnon ne me, grēse ne ne nac ne zha ne ngab lo Jesús! Sca rieguaḷa.

Pabl

**Diidz ne rdeed guielmban  
New Testament in Zapotec, Mixtepec  
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

**Copyright Information**

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mixtepec

**© 1998, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 18 Apr 2025 from source files  
dated 29 Jan 2022

5317ca58-7555-5e4c-a420-e1e9210e2df2